

之盟吳夫聚王謂困獸猶鬪漢趙充國言緩之則走不顧急之則還致死蓋亦近之此用兵之法也

孫子註解卷之七

七

四十一

孫子註解卷之八

性八

九變篇也。王哲曰：昔謂九者，數之極，用兵之法，當極其變耳。逸詩云：九變復貫，不知曹公謂何為九或曰：九地之變也。張預曰：變者不拘常法，臨事適變，從宜而行之謂也。凡與人爭利，必知九地之變，故大軍爭。

孫子曰：凡用兵之法，將受命於君，合軍聚眾。

張預曰：已解上文。

圯地無舍。

曹操曰：無所依也。水毀曰圯。李筌曰：地下曰圯，行必水淹也。陳暉曰：圯，低下也。

孔明謂之地獄，獄者中下四面高也。孟

氏曰：太下則為敵所囚。杜佑曰：擇地頓

兵當趨利而避害也。梅堯臣曰：山林險

阻沮澤之地不可舍止，無所依也。何氏

曰：下篇言圯地，則吾將進其塗，謂必固之

地宜速去之也。張預曰：山林險阻沮澤

凡難行之道為圯地，以其無所依，故不可

舍止。

衢地交合。

曹操曰：結諸侯也。李筌曰：四通曰衢，結

諸侯之交地也。賈林曰：結諸侯以為援

梅堯臣曰：夫四通之地與旁國相通，當結其交也。何氏曰：下篇云衢地，吾將固其結言交結諸侯使牢固也。張預曰：四通之地旁有鄰國先往結之，以為交援。

絕地無留。

曹操曰：無久止也。李筌曰：地無泉井畜

牧來樵之處為絕地，不可留也。賈林曰：

谿谷坎險前無通路曰絕，當速去無留。○

梅堯臣曰：始去國始出境，猶不居輕地，是

不可久留也。張預曰：去國越境而師者，

絕地也。危絕之地過於重地，故不可淹留

久止也。

圍地則謀。

曹操曰：發奇謀也。李筌曰：因地能通。○

賈林曰：居四險之中曰圍地，敵可往來，我

難出入，居此地者可預設奇謀，使敵不為

我患，乃可濟也。梅堯臣曰：往返險迂當

出奇謀。○何氏曰：下篇亦云圍地，則謀言

在艱險之地與敵相持，須用奇險詭譎之

謀不至於害也○張預曰居前隘後固之地當發奇謀若漢高為匈奴所圍用陳平奇計得出近之

死地則戰

曹操曰殊死戰也○李荃曰置兵於必死

之地人自為私闢韓信破趙此是也○梅堯臣曰前後有礙決在死戰此而上舉九地之大約也○王哲註上之五地並同曹公○何氏曰下篇亦云死地則戰者此地速為死戰則生若緩而不戰氣衰糧絕不

變蓋九變五利相須而用故兼言之

塗有所不由

曹操曰隘難之地所不當從不得已從之

故為變○李荃曰道有險狹懼其邀伏不可由也○杜牧曰後漢光武遣將軍馬援

耿舒討武陵五谿蠻軍次下雋今辰州也有兩道可入從壺頭則路近而水險從充道則路夷而運遠帝初以為疑及軍至耿舒欲從充道援以為棄日費糧不知進壺頭搃其咽喉則賊自破以事上之帝從援策乃進營壺頭賊乘高守隘水疾船不得上會暑濕士卒多疫死援亦中病卒耿舒與兄好時侯書曰舒前上言當先擊充糧雖難運而兵馬得用軍人數萬爭欲先奮今壺頭竟不得進大衆怫鬱行死誠可痛惜○賈林曰由從也途且不利雖近不從杜佑曰阨難之地所不當從也不得已從之故為變也○梅堯臣曰避其險阨也○王哲曰途雖可從而有所不從慮奇伏也若趙涉說周亞夫避殺阨隘之間慮置

伏兵請走藍田出武關抵洛陽間不過差

一二日是也○張預曰險阨之地車不得

方軌騎不得成列故不可由也不得已而

行之必為權變韓信知陳餘不用李左車計乃敢入井陘口是也

軍有所不擊

曹操曰軍雖可擊以地險難久留之失前

利若得之則利薄因窮之兵必死戰也○

杜牧曰蓋以銳卒勿攻歸師勿遏窮寇勿

迫死地不可攻或我強敵弱敵前軍先至

亦不可擊恐驚之退走也言有如此之軍

皆不可擊斯統言為將須知有此不可擊

之軍即須不擊益為知變也故列於九變

篇中○陳皞曰見小利不能傾敵則勿擊

之恐重勞人也○賈林曰軍可感懷勢將

降伏則不擊寇窮據險擊則死戰可自固

守待其心惰取之○杜佑曰軍雖可擊以

地險難久留之失前利若得之利薄也窮

困之卒隘陷之軍不可攻為死戰也當固

守之以待隙也○梅堯臣曰往無利也○

王哲曰曹公曰軍雖可擊以地險難久留之失前利若得之則利薄曹謂餌兵銳卒正正之旗堂堂之陳亦是也○張預曰縱之而無所損克之而無所利則不須擊也又若我弱彼強我曲彼直亦不可擊如晉楚相持士會曰楚人德刑政事典禮不易不可敵也不為是征義相近也

城有所不攻

曹操曰城小而固糧饒不可攻也操所以置華費而深入徐州得十四縣也○杜牧曰操捨華費不攻故能兵力完全深入徐州得十四縣也蓋言敵於要害之地深峻城隍多積糧食欲留我師若攻拔之未足為利不拔則挫我兵勢故不可攻也宋順帝時荊州守沈攸之反素蓄士馬費用豐積戰士十萬甲馬二千軍至郢城功曹臧寅以為攻守兵勢非旬日所拔若不時舉挫銳損威今順流長驅計日可捷既傾覆本則郢城豈能自固故兵法曰城有所不攻是也攸之不從郢郡守柳世隆拒攸之

攸之盡銳攻之不克眾潰走入林自縊後周武帝欲出兵於河陽以伐齊吏部宇文弼進曰今用兵須擇地河陽要衝精兵所聚盡力攻之恐難得志如臣所見彼汾之曲成小山平攻之易拔用武之地莫過於此帝不納師竟無功復大舉伐齊卒用弼計以滅齊國家自元和三年至于今三十年間凡四攻寇魏薄攻寇之南宮縣上黨攻寇之臨城縣太原攻寇之河星鎮是寇三城池浚壁堅虜粟未石金炭麻膏凡城

守之資常為不可勝之計以備官軍擊虜攻既不拔兵頓力疲寇以勁兵來救故百戰百敗故三十年間困天下之功力攻數萬之寇四圍其境通計十歲竟無尺寸之功者蓋常墮寇計中不能知變也○賈林曰臣忠義重稟命堅守者亦不可攻也○梅堯臣曰有所害也○王哲曰城非控要雖可攻然懼於鈍兵挫銳或非堅實而得士死力又剋雖有期而敵兵至吾雖得之利不勝其所害也○張預曰拔之而不能

守委之而不為患則不須攻也又若深溝高壘卒不能下亦不可攻如士白請伐偃陽荀彧曰城小而固勝之不武弗服為笑是也

地有所不爭

曹操曰小利之地方爭得而失之則不爭也○杜牧曰言得之難守失之無害伍子胥諫夫差曰今我伐齊獲其地猶石田也東晉陶侃鎮武昌議者以武昌北岸有郛城宜分兵鎮之侃每不答而言者不已侃乃渡水獵引諸將佐語之曰我所以設險而禦寇正以長江耳郛城隔在江北內無所倚外接羣夷夷中利深晉人貪利夷不堪命必引寇虜乃致禍之由非禦寇也且今縱有兵守之亦無益於江南若羈虜有可乘之會此又非所資也後庾亮戍之果大敗也○梅堯臣曰得之無益者○王哲曰謂地雖要害敵已據之或得之無所用若難守者○張預曰得之不便於戰失之無害於己則不須爭也又若遠遠之地雖

得之終非己有亦不可爭如吳子伐齊伍
負諫曰得地於齊猶獲石田也不如早從
事於越不聽為越所滅是也

君命有所不受

曹操曰苟便於事不拘於君命也○李筌

曰苟便於事不拘於君命稷直斬莊賈魏絳
戮楊干是也○杜牧曰尉繚子曰兵者凶
器也爭者逆德也將者死官也無天於上
無地於下無敵於前無主於後○賈林曰
決必勝之機不可推於君命苟利社稷事
之可也○孟氏曰無敵於前無君於後閻
外之事將軍制之○梅堯臣曰從宜而行
也此而上五利也○張預曰苟便於事不
從君命夫桀王曰見義而行不待命是也
自塗有所不由至此為五利或曰自地地
無舍至地有所不爭為九變謂此九事皆
不從中覆但臨時制宜故統之以君命有
所不受
故將通於九變之地利者知用兵矣
李筌曰謂上之九事也○杜佑曰九事之

變皆臨時制宜不由常道故言變也○賈
林曰九變上九事將帥之任機權過勢則
變因利則制不拘常道然後得其通變之
利變之則九數之則十故君命不在常變
例也○梅堯臣曰達九地之勢變而為利
也○王皙曰非賢智不能盡事理之變也
何氏曰孫子以九變名篇解者十有餘家
皆不條其九變之目者何也蓋自地地無
舍而下至君命有所不受其數十矣使人
不得不惑愚熟觀文意上下止述其地之

利害爾且十事之中君命有所不受且非
地事昭然不類矣蓋孫子之意言凡受命
之將合聚軍眾如經此九地有害而無利
則當變之雖君命使之舍留攻爭亦不受
也況下文言將不通於九變之利者雖知
地形不能得地之利矣其君命豈得與地
形而同算也況下之地形篇云戰道必勝
主曰無戰必戰可也戰道不勝主曰必戰
無戰可也厥旨盡在此矣○張預曰更變
常道而得其利者知用兵之道矣

將不通於九變之利者雖知地形不能得地
之利矣

賈林曰雖知地形心無通變豈惟不得其
利亦恐反受害也將貴通變也○梅堯臣
曰知地不知變安得地之利○張預曰凡
地有形有變知形而不曉變豈能得地之
利

治兵不知九變之術雖知五利不能得人之
用矣

曹操曰謂下五事也九變一云五變○賈
林曰五利五變亦在九變之中過勢能變
則利不變則害在人故無常體能盡此理
乃得人之用也五變謂途雖近知有險阻
奇伏之變而不由軍雖可擊知有窮蹙死
關之變而不擊城雖勢孤可攻知有糧充
兵銳將智臣忠不測之變而不攻地雖可
爭知得之難守得之無利有反奪傷人之
變而不爭君命雖宜從之知有內御不利
之害而不受此五變者臨時制宜不可預
定貪五利者途近則由軍勢孤則擊城勢

危則攻地可取則爭軍可用則受命貪此五利不知其變宜惟不得人用抑亦敗軍傷士也○梅堯臣曰知利不知變安得人而用○王皙曰雖知五地之利不通其變如膠柱鼓瑟耳○張預曰凡兵有利有變知利而不識變豈能得人之用曹公言下五事為五利者謂九變之下五事也非謂雜於利害已下五事也

是故智者之慮必雜於利害
 曹操曰在利思害在害思利當難行權也
 李筌曰害彼利此之慮○賈林曰雜一為親一為難言利害相參雜智者能慮之慎之乃得其利也○梅堯臣同曹操註○王皙曰將通九變則利害盡矣○張預曰智者慮事雖處利地必思所以害雖處害地必思所以利此亦通變之謂也

雜於利而務可信也
 曹操曰計敵不能依五地為我害所務可信也○杜牧曰信申也言我欲取利於敵人不可但見取敵人之利先須以敵人害

我之事參雜而計董之然後我所務之利乃可申行也○賈林曰在利之時則思害以自慎一云以害雜利行之威令以臨之刑法以戮之已不二三則眾務皆信人不敢欺也○梅堯臣曰以害參利則事可行王皙曰曲盡其利則可勝矣○張預曰以所害而參所利可以伸己之事鄭師克蔡國人皆喜惟子產懼曰小國無文德而有武功禍莫大焉後楚果伐鄭此是在利思害也

雜於害而患可解也
 曹操曰既參於利則亦計於害雖有患可解也○李筌曰智者為利害之事必合於道不至於極○杜牧曰我欲解敵人之患不可但見敵能害我之事亦須先以我能取敵人之利參雜而計董之然後有患乃可解釋也故上文云智者之慮必雜於利害也譬如敵人圍我我若但知突圍而去志必懈怠即必為追擊未若勵士奮擊因戰勝之利以解圍也舉一可知也○賈林

曰在害之時則思利而免害故措之死地則生投之亡地則存是其患解也○梅堯臣曰以利參害則禍可脫○王皙曰周知其害則不敗矣○何氏曰利害相生明者常慮○張預曰以所利而參所害可以解已之難張方入洛陽連戰皆敗或勸方宵遁方曰兵之利鈍是常貴因敗以為成耳夜潛進逼敵遂致克捷此是在害思利也是故屈諸侯者以害

曹操曰害其所惡也○李筌曰害其政也
 杜牧曰惡音一路反言敵人苟有所惡之事我能乘而害之不夫其機則能屈敵也○賈林曰為害之計理非一途或誘其賢智令彼無臣或遺以姦人破其政令或為巧詐間其君臣或遺工巧使其人疲財耗或漬淫樂變其風俗或與美人惑亂其心此數事若能潛運陰謀密行不泄皆能害人使之屈折也○梅堯臣曰制之以害則屈也○王皙曰窮屈於必害之地勿使可解也○張預曰致之於受害之地則自

可解也○張預曰致之於受害之地則自

屈服或曰間之使君臣相疑勞之使民失業所以害之也若韋孝寬間斛律光高顯平陳之策是也

役諸侯者以業

曹操曰業事也使其煩勞若彼入我出彼

出我也○李筌曰煩其農也○杜牧曰

言勞役敵人使不得休我須先有事業乃

可為也事業者兵衆國富人和令行也○

杜佑曰能以事勞役諸侯之人令不得安

佚韓人令秦懲業之類是也或以奇技藝

業淫巧功能令其耽之心目內役諸侯若

此而勞○梅堯臣曰撓之以事則勞○王

哲曰常若為攻襲之業以弊敵也田常曰

吾兵業已加魯矣○張預曰以事勞之使

不得休或曰壓之以富彊之業則可役使

若晉楚國彊鄭人以犧牲玉帛奔走以事

之是也

趨諸侯者以利

曹操曰令自來也○李筌曰誘之以利○

杜牧曰言以利誘之使自來至我也墮吾

畫中○孟氏曰趨速也善示以利令忘變

而速至我作變以制之亦謂得人之用也

梅堯臣同杜牧註○王哲曰趨敵之間當

周旋我利也○張預曰動之以小利使之

必趨

故用兵之法無恃其不來恃吾有以待也○

梅堯臣曰所恃者不懈也

無恃其不攻恃吾有所不可攻也

曹操曰安不忘危常設備也○李筌曰預

備不可闕也○杜佑曰安則思危存則思

亡常有備○梅堯臣曰所賴者有備也○

王哲曰備者實也○何氏曰吳略曰君子

當安平之世刀劍不離身古諸侯相見兵

衛不徹警蓋雖有文事必有武備況守邊

固圍交刃之際敵凡兵所以勝者謂擊其

空虛襲其懈怠苟嚴整終事則敵人不至

傳曰不備不虞不可以師昔晉人禦秦深

壘固軍以待之秦師不能久楚為陳而吳

人至見有備而返程不識將屯正部曲行

伍營陳擊刁斗吏治軍簿虜不得犯朱然

為軍師雖世無事每朝夕嚴鼓兵在營者

咸行裝就隊使敵不知所備故出輒有功

是謂能外禦其侮者乎常能居安思危在

治思亂戒之於無形防之於未然斯善之

善者也其大莫如險其走集明其伍侯慎

固其封守繕完其溝隍或多調軍食或益

修戰械故曰物不素具不可以應卒又曰

惟事事乃其有備有備無患常使彼勞我

佚彼老我壯亦可謂先人有奪人之心不

戰而屈人之師也若夫莒以恃陋而潰齊

以狎敵而殲號以易晉而亡魯以果邾而

敗莫敖小羅而無次吳子入巢而自輕斯

皆可以作鑒也故吾有以待吾有所不可

攻者能豫備之之謂也○張預曰言須思

患而預防之傳曰不備不虞不可以師

故將有五危

李筌張預曰下五事也

必死可殺也

曹操曰勇而無慮必欲死鬪不可曲撓可

以奇伏中之○李筌曰勇而無謀也○杜

故曰將愚而勇者患也黃石公曰勇者好行其志愚者不顧其死吳子曰凡人之論將常觀於勇勇之於將乃數分之一耳夫勇者必輕合輕合而不知利未可將也梅堯臣同李筌註○何氏曰司馬法曰上

死不勝言責其謀勝也○張預曰勇而無謀必欲死鬪不可與力爭當以奇伏誘致而殺之故司馬法曰上死不勝言將無策略止能以死先士卒則不勝也必生可虜也

曹操曰見利畏法不進也○李筌曰疑怯可虜也○杜牧曰晉將劉裕沂江追桓玄戰于崢嶸洲于時義軍數千玄兵甚盛而玄懼有敗劔常漾輕舸於舫側故其眾莫有鬪心義軍乘風縱火盡銳爭先玄眾是以大敗也○孟氏曰將之怯弱志必生返意不親戰士卒不精上下猶豫可急擊而取之新訓曰為將怯悞見利而不能進太公曰失利後時反受其殃○梅堯臣曰怯而不果○王哲曰無鬪志曹公曰見利怯

不進也皆謂見害亦輕走矣○何氏曰司馬法曰上生多疑疑為大患也○張預曰臨陳畏怯必欲生返當鼓譟乘之可以虜也晉楚相攻晉將趙嬰齊令其徒先具舟於河欲敗而先濟是也

忿速可侮也
曹操曰疾急之人可忿怒侮而致之也○李筌曰急疾之人性剛而可侮致也太宗殺宋老生而平霍邑○杜牧曰忿者剛怒也速者褊急也性不厚重也若敵人如此

可以凌侮使之輕進而敗之也十六國姚襄攻黃洛前秦符生遣符黃眉鄧羌討之襄深溝高壘固守不戰鄧羌說黃眉曰襄性剛狼易以剛動若長驅鼓行直壓其壘必忿而出師可一戰而擒也黃眉從之襄怒出戰黃眉等斬之○杜佑曰急疾之人可忿怒而致死忿速易怒者猶慧疾急不計其難可動作欺侮○梅堯臣曰猶急易動○王哲曰將性貴持重忿猶則易撓○張預曰剛愎褊急之人可凌侮而致之楚

子玉剛忿晉人執其使以怒之果從晉師遂為所敗是也

廉潔可辱也
曹操曰廉潔之人可汙辱致之也○李筌曰矜疾之人可辱也○杜佑曰此言敵人

若高壁固壘欲老我師我勢不可留利在速戰揣知其將多忿急則輕侮而致之性本廉潔則汙辱之如諸葛孔明遺司馬仲達以中脞欲使怒而出戰仲達忿怒欲濟師魏帝遣辛毗仗節以止之仲達之才猶

不勝其忿况常才之人乎○梅堯臣曰徇名不顧○王哲同曹操註○張預曰清潔愛民之士可垢辱以撓之必可致也愛民可煩也
曹操曰出其所以趨愛民者則必倍道兼行以救之救之則煩勞也○李筌曰攻其所愛必卷甲而救愛其人乃可以計疲○杜牧曰言仁人愛民者惟恐殺傷不能捨短從長棄彼取此不度遠近不量事力凡為我攻則必來救如此可以煩之令其勞

頓而後取之也○陳暉曰兵有須救不必救者項羽救趙此須救也亞父委梁不必救也○賈林曰廉潔之人不好侵掠愛人之仁不好鬪戰辱而煩之其動必敗○梅堯臣曰力疲則困○王哲曰以奇兵若將攻城邑者彼愛民必數救則煩勞也○張預曰民雖可愛當審利害若無微不救無遠不援則出其所必趨使煩而困也

凡此五者將之過也用兵之災也

陳暉曰良將則不然不必死不必生隨事而用不忿速不耻辱見可如虎否則閉戶動靜以計不可喜怒也○梅堯臣曰皆將之失為兵之凶○何氏曰將材古今難之其性往往失於一偏爾故孫子首篇言將者智信仁勇嚴貴其全也○張預曰庸常之將守一而不知變故取則於己為凶於兵智者則不然雖勇而不必死雖怯而不必生雖剛而不可侮雖廉而不可辱雖仁而不可煩也
覆軍殺將必以五危不可不察也

賈林曰此五種之人不可任為大將用兵必敗也○梅堯臣曰當慎重焉○張預曰言須識權變不可執一道也

孫子註解卷之八



孫子註解卷之九

善一

行軍篇曹操曰得便利而行也張預曰如九地之變然後可以得利而行軍故大九變

孫子曰凡處軍相敵

王哲曰處軍凡有四相敵凡三十有一○

張預曰自絕山依谷至伏姦之所處則處軍之事也自敵近而靜至必謹察之則相敵之事也相猶察也料也

絕山依谷

曹操曰近水草利便也○李荃曰軍我敵彼也相其依止則勝敗之數彼我之勢可知也絕山守險也谷近水草夫列營壘必先分卒守隘縱畜牧牧樵採而後寧○杜牧曰絕過也依近也言行軍經過山險須近谷而有水草之利也具子曰無當天窺大谷之口言不可當谷但近谷而處可也○賈林曰兩軍相當敵宜擇利而動絕山跨山依谷傍谷也跨山無後患依谷有水草也○梅堯臣曰前為山所隔則依谷以為固○王哲曰絕度也依謂附近耳曹公